

【蛻變】徐佳好原作

記得俵仔讀小學個時節，放學轉到屋下興嘍嘍仔<sup>1</sup>同俵分享，上自然課，先生紹介揚蝶仔，佢感覺著當生趣，問俵：「阿姆，做得畜虐毛蟲無？」俵淨聽過有人畜細魚仔、蠶仔<sup>2</sup>、雞油蛄，哪有人畜虐毛蟲？

該時，俵在學校做志工，同圖書室個細阿姊仔打嘴鼓，佢講：「淨愛種一頭柚仔樹抑係柑仔樹，就會有揚蝶仔飛來生卵。你過準備一隻罐仔，裡肚放一支細樹極，恁樣就做得哩喲。」俵一聽著，心肚當疑狐：自家又無歇在莊下，種一頭柚仔樹就會錫揚蝶仔來，哪有可能？毋過，「狗呷烏蠅，賭造化」<sup>3</sup>罔試看啊。

講來奇怪咧！有一日，正經有一隻揚蝶仔，在俵兜種個柚仔樹脣飛來飛去，飛上飛下。心肝恸：佢在該做麼个呢？俵目金金仔緊看，佢緊撲翼，又對屎肫尾緊屙出細細粒、黃臘臘个卵在葉仔項。俵細心細意，摘下這皮葉仔帶轉屋下放到罐仔裡背。

幾日過後，幼蟲對卵肚鑽出來，一出世，黏時食忒卵殼。虐

毛蟲當揀食，淨食合意个葉仔，像一個當肚飢个細孺仔，葉仔分佢食到淨淨淨，淨伸葉脈，俵仔都赴毋掣摘葉仔分佢食！佢兜緊食圓身緊大籬，該白烏色个衫褲忒狹，僅可脫下舊衫換青衫。

有時節，蠻皮个俵仔係「頭那插禾串」撩刁佢，佢會跔等臥起圓圓大大个頭那，還過伸出紅紅个角，放出像榴槿恁樣臭胖胖仔个味緒，想愛嚇走欺負佢个人；毋過，若係正經堵著烏仔、油籬蜂，佢兜斯插都毋插。有一擺，俵識看著，自家畜个虐毛蟲毋知分對哪來个蜂仔食忒，衰過个虐毛蟲，瀉都毋掣！一無注意，嘎發生恁樣悲慘个情形，實在得人驚！

虐毛蟲每日都盡命牯緊食葉仔，食到圓身肥卒卒毋知飽。有一日暗晡，看佢辽辽腦轉<sup>4</sup>，葉仔毋食，淨在罐仔肚趨來趨去，毋知在該無閒麼个。佢屙了一堆青青个瀉粑，俵仔問：「佢係發病仔無？仰會屙痢肚？」忽然間，佢趨在該樹極項，呢絲<sup>5</sup>同自家吊掛起來，摻自家跂等<sup>6</sup>，囿在蠶筴<sup>7</sup>肚，像睡忒哩！

過一禮拜零，蠶筴變色，像變奇術樣仔，虐毛蟲對蠶筴肚鑽出來哩啲<sup>8</sup>！毋過，溼溼、皺皺个翼還言燥，佢定定仔、柔柔仔，當有耐心个等待，正經係老古人言講个：「甘蔗食了一目正一目」，毋好「打卵就愛見黃」。看著這靚膩膩个花仙子，親像係同俵兜講等人生當多道理啊。

<sup>1</sup> 興嘍嘍仔：音 him du du e`；興沖沖的。

<sup>2</sup> 蠶仔：音 cam` e`；蠶。

<sup>3</sup> 狗呷烏蠅，賭造化：音 giou` gab vu` in`，du` co fa；狗突然張口去咬飛過的蒼蠅，能否咬到就看運氣。

<sup>4</sup> 辽辽腦轉：音 din` din` no` zon`；繁忙、躁動不安。

<sup>5</sup> 呢絲：lien` sii`，吐絲。

<sup>6</sup> 跂等：音 giu` den`；蜷縮著。

<sup>7</sup> 蠶筴：音 cam` giab`；蠶繭。

<sup>8</sup> 哩啲：音 lio`；語氣詞「哩、啲」合音，表示變化已經實現。

【阿咪<sup>1</sup>】李夢花原作

吾屋下從來就毋識畜狗畜貓，一來係阿姆歸日仔做事無閒泊杈，又愛無閒煮三餐，二來係佢當愛淨俐，畜狗仔同貓仔驚怕會遭跳蚤。一直到老弟間房个天篷頂，逐暗晡一群老鼠在該走來走去，呼呼磅磅<sup>2</sup>吵到佢睡毋得，正高不將同上屋个鄰舍，捉一隻細貓子畜來打老鼠。

鄰舍个貓嫲這胎正養兩隻，一隻就係吾屋下這隻，灰色間<sup>3</sup>白色同豬肝色花刺花刺<sup>4</sup>，看起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌腳个下背幾日仔，恁樣正會認屋，阿爸就摺佢綯到桌腳下。正經有影哦！幾日仔放佢，阿咪就乖乖乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒飽，慣勢咧就毋會去打老鼠。」聽雜貨店个叔姆講厥屋下該隻，就係食到肥固固仔，日日食飽睡、睡飽食，連老鼠在脣頭過，佢就目珠擘開睜一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味緒，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸胥疏个暗晡頭，看著佢个目珠仁，像兩粒青色个寶石樣仔當金當靚，灶下个黃蜚趨來趨去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞哩。

毋多知仔，阿咪畜有十四年咧，照偲人个年齡換算，佢有七十零歲哩。該日阿咪懶甥甥仔無精神，食个東西又嘔出來，好得看過獸醫注射過，幾日仔就好咗。阿姆笑笑仔對阿咪講：「你同佢共樣，老咧。」阿咪當像聽得識樣仔，第二日打隻細老鼠挑挑放在灶下，像係愛摺阿姆講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜同人共樣，係有感情有靈性个，還有該種毋認老个打拚精神啊。

<sup>1</sup> 阿咪：音 a' mi；貓的名字。

<sup>2</sup> 呼呼磅磅：音 bin bin bong bong；狀聲詞，形容老鼠在天花板跑動的聲響。

<sup>3</sup> 間：音 gam；摻雜調和。

<sup>4</sup> 花刺花刺：音 fa' la' fa' la'；花色混雜。

【大箍牯減肥記】曾菁怡原作

「哇！歸桌仔恁多好料仔！汽水、餅仔、披薩、雞卵糕、枝仔冰，還有佢盡好食个焗菜、雞髀<sup>1</sup>。」佢看到無瞞目，口涎水強強會跌下來，該兜好料仔像同佢撲手講：「遽遽來食，遽遽來食唷！」佢煞煞抓一支香噴噴仔个雞髀，該油亮油亮个皮焙到喇喇，肉汁汀汀汀汀，實在還錫人哪！就在佢嘴擘到大大，準備咬啊下去該下，嘎聽著：「大箍牯，還毋跣床？讀書會赴毋掣哩！」全部个好料仔一下仔嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽吾姆講，佢從細就異好嘴斗，生到肉卒卒仔，幼皮白肉，盡得人惜。公太就盡愛撚吾面頰卵，講佢像正打好个粢粑仔分人想愛咬一口。原本佢無感覺肥固固个身材有麼个毋好，但係該擺見笑个經驗分佢堅心愛減肥哩。

該日學校辦校慶活動，吾班級表演「三隻細豬仔」个話劇，佢係擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔因該下，為著有緊張个氣氛，佢

盡命牯飆過去愛鑽入豬老弟个屋仔裡肚。麼人知，一下忒大力，豬老弟个屋仔嘎分佢撞橫下去，佢還仆在屋仔面頂，屎肫翹到半天高，纏繃繃仔个褲弓到暴線縫……。該時，鬧熱煎煎个禮堂忽然間變到一片恬靜，佢還聽得著自家砰砰砰个心跳聲，額頭流下來个汗水每一滴佢就感覺得著……，實在還見笑哦！愛仰結煞正好？落尾，有聲音摻佢解圍哩，佢遽遽企起來行到舞臺脣換褲；該聲音，毋係佢期待个拍手聲，係大家笑到歸身仔緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁強个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，故所該兜油漬漬仔<sup>2</sup>个焗菜、甜濟濟仔<sup>3</sup>个汽水、糖仔全部分佢拒絕，逐餐飯菜都食較清較齋兜仔，食到七分飽就好。佢還每日運動三十分鐘，行路、打球仔、跳索仔……，逐日做無共樣个變化。

一隻月過後，吾姆帶等佢去買新衫褲，每一領个尺寸都減兩號，阿姆講：「從今以後做毋得過喊你『大箍牯』咧。」「係啊！你愛喊佢『緣投哥』哩。」

大箍牯減肥，成功！

<sup>1</sup> 雞髀：音 gie' bi'；雞腿。

<sup>2</sup> 油漬漬仔：音 iu' ji ji e'；形容沾滿了油。

<sup>3</sup> 甜濟濟仔：音 tiam' ji' ji' e'；形容味道甜膩。

【擲牙齒】張旭英原作

堵好係換牙齒个七八歲，舊个牙齒言啟忒，新牙就先暴出來，也就係人講个生豬哥牙啦，又恁堵好係頭前个當門牙，係講無先摻舊牙擲忒，一方面驚怕會影響新牙个生長，再方面細阿妹仔个門面就會媿到看毋得。

就恁樣，第二日吾爸渡係坐巴士去街項齒科擲牙齒。還當記得愛去街項个前一暗晡吾姆遽遽用裁縫車踏踏啊，兩下半就做好一身完匹斯<sup>1</sup>愛分係著去街項擲牙齒。毋知係毋係著新衫心頭歡喜，對黏時愛擲牙齒个緊張，試著較毋會發痴驚<sup>2</sup>。去到先生該位，護理師先摻係注痺藥，先生一抹煞<sup>3</sup>擲忒四支舊牙，護理師喊講棉花愛用力咬等，痺藥言過，故所也無感覺著有幾痛。坐有一下仔，護理師講做得轉去哩！拿好藥包交待講係止痛藥，實在當痛痛到佇毋著<sup>4</sup>就愛拿來食，係講會試著毋爽快，就愛倒轉來分先生看。

<sup>1</sup> 完匹斯：音 van' pi sii'；外來客家語，連身洋裝。

<sup>2</sup> 發痴驚：音 bod' cii' giang'；受到驚嚇而心中感到害怕，甚至起雞皮疙瘩。

<sup>3</sup> 一抹煞：音 id' mad' sad'；全部。

<sup>4</sup> 佇毋著：音 du m' diau'；指身體或心理不能負荷或承受。

係跔等吾爸个尸背尾，準備愛行去赴車枋<sup>5</sup>，欸！仰毋係行去車頭个方向？該時係還無法度講話，用手拉吾爸衫腳提醒阿爸行毋著哩，指等車頭該片，吾爸笑微微仔講：「偲兩儕，先來去食一碗冰正去坐巴士」。包尾係正知，食冰就係驚痺藥過忒開始會痛，吾爸知得棉花拿忒驚怕會出血，食冰暫時做得止血止痛。該碗冰係清冰，白雪雪个冰、淋一息仔烏糖水，該冰冰涼涼、甜甜个味緒係永久記得。下後再點清冰來食，係嘎尋毋著當時該種味緒。

擲忒四支牙齒个係，跔等吾爸歡歡喜喜食冰，又安安心心坐等巴士轉屋下，毋知續下來還有愛面對个事情。第一，就係暫時做毋得食硬飯，淨做得食粥無就食麵；第二，少忒四支牙齒暫時變到當媿，會分人笑「缺牙耙」。仰結煞<sup>6</sup>正好呢？該時言有嘴落仔<sup>7</sup>好落，高不將嘴恬恬莫講話，就毋會分人看著吾牙齒少忒四支，還有食粥無就食麵，驚怕愛食一駁仔<sup>8</sup>哩啲！

這下吾當門牙生到齊齊正正，除忒愛感謝吾爸个智慧，還有吾姆做一身新衫分係，使致當少出門个細阿妹增加異多个勇氣，做得勇敢去面對擲牙齒个事情。

<sup>5</sup> 赴車枋：音 fu ca' biong'；趕車。

<sup>6</sup> 仰結煞：音 ngiong gad' sad'；怎麼辦；如何是好。

<sup>7</sup> 嘴落仔：音 zoi lab' e'；口罩。

<sup>8</sup> 一駁仔：音 id' bog' e'；一陣子。

【 蛎蜃仔<sup>1</sup> 】徐姿華原作

記得讀二年生該年，連續漚雨<sup>2</sup>幾下禮拜，落到人都硬硬會生菇哩！直直到拜三朝晨正斷雨腳<sup>3</sup>，當晝放學還有日頭花對貴貴个烏雲肚箭出來，大家都當歡喜，排列行出學校門。著等水靴仔、蠻皮个細俖仔就開始涉水<sup>4</sup>搞，泥水激到脣項个細妹同學吱吱滾，緊閃、緊跳、緊走，笑聲、鬧聲、罵人聲，搵等轉好个天時，大家个心情也像慢慢仔散忒个烏雲緊來緊開。

佢同老弟轉到屋面前个楓樹伯公下，看著一陣細細隻、頭大大、烏烏个魚仔在路脣落雨過後个細水窟肚，汨來汨去當生趣。佢兩儕跔等看到毋記得好轉，阿婆等無佢兜，行出禾埕大聲咻，佢兜正真毋甘願个行轉屋下。

佢兩儕晡著阿婆去睡當晝个時節，偷偷仔拿等空个乳粉罐仔，去楓樹伯公下捉魚仔。驚大人知著會罵，佢兜就同捉著个六尾魚仔，偷偷仔畜在書桌下，愛去上課同放學轉都會先去看一下，等愛寫字个時節正同佢兜拿出來放在桌項，陪佢兜寫字。

第三日打早，老弟去看魚仔了後赴等愛去上課，乳粉罐仔無

放好勢嘎橫忒，等佢兜下晝轉到屋下，水硬硬會流淨咗，罐項淺淺个水肚伸著一尾魚仔定定，另外五尾魚仔燥死在書桌仔下咧。佢兩儕當傷心，同五尾魚仔埋在花園肚个桂花樹下，希望佢兜做得鼻得著桂花个香味。伸著該尾細魚仔，佢兜就過較細心細意照顧佢，大約一禮拜換一到水，還分佢食嫩嫩个菜葉仔。

十外日過，該尾魚仔嘎生出兩支腳，佢兜試著魚仔會生腳當生趣，忍毋核偷偷仔同阿爸講，阿爸看咗講：「該毋係魚仔，係『蛎蜃仔』、蛎仔个細人仔。」差毋多又過一禮拜，蛎蜃仔又生出前腳哩，佢有四隻腳還有尾，在水肚汨來汨去，當風神。

學校放暑假哩，阿姆同往年共樣帶佢兜轉姐婆屋下奈一禮拜，佢兜心肝肚掛吊等書桌下个蛎蜃仔，言曾言<sup>5</sup>就緊討愛轉。一轉到屋下，老弟黏時蹤入間肚，跔等就噉到大嫲聲，佢兜赴毋掣攞包袱仔，就煞煞走入間肚去，看佢做麼个噉？老弟指等空空个乳粉罐仔，同脣項个跳啊跳个蛎仔，噉到緊發噎<sup>6</sup>，講：「嗚……蛎蜃仔……，分蛎仔食忒咧啦！嗚……」，阿爸聽著，緊掌老弟个頭那，忍等笑同老弟講：「大戇俖，若蛎蜃仔大哩，變做蛎仔咧啦！毋係分蛎仔食忒。莫噉啦！」，老弟聽著恁樣講，正轉笑面。

因為童年畜「蛎蜃仔」个經驗，分老弟對自然科學當有興頭，這下老弟既經係當受學生仔歡迎个自然科先生，也輒輒會帶細人仔滿哪仔去做研究呢！

<sup>1</sup> 蛎蜃仔：音 guai` ngiam e`；蝌蚪。

<sup>2</sup> 漚雨：音 eu i`；下很久的雨。

<sup>3</sup> 斷雨腳：音 ton` i` giog`；久雨終於停了。

<sup>4</sup> 涉水：音 zeb sui`；腳踏入水中。

<sup>5</sup> 言曾言：音 mang` qien` mang`；時候未到。

<sup>6</sup> 發噎：音 bod` ed；哭得喘不過氣來。



【好空】徐子涵原作

人講，笑頭笑面个人較有人緣；佢講，會講客个細人仔較得人惜。係兩種加起來，就會變出當多好空个事情出來哦！

社區肚个老老嫩嫩，佢比吾姆還較熟事；社區肚个事情，乜比佢還較瞭解。成時攞兜仔菜、帶兜仔糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係搞个，所有好空个，通棚都係佢好嘴碼摺禮貌換來个。

對門九十六歲个伯婆太講，這下个細人仔，毋知係畏羞抑係搨屎，盡少像佢恁有笑容、恁會同人相借問个，故所特別惜佢，盡阿謔佢。佢輒輒會攞手喊佢過去，拿兜仔零嗒分佢食，佢講就佢正有恁好空。同佢講話，全全愛用客話講，佢正聽得識，佢想怕係因為恁樣，正無細人仔愛同佢講話。三條巷仔个細人仔，就單淨佢一儕做得同佢謔多半點鐘久，無講花蓼哦！

莫看佢年紀還細，係自行車落鏈<sup>1</sup>、輪仔同球仔無風，佢自家就有辦法，毋使花錢去尋人搨手整、搨手嘮風。係愛打羽毛球，

乜有大人同佢做伴搞，恁樣講，你就知吾个朋友有幾多、年齡層有幾闊哩！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢當笑面，會同人打嘴鼓，還會同人搨手。比將講搨手倒垃圾、拚資源回收个東西、講兜仔笑科分人笑、講兜仔令仔分佢兜揣、講兜仔生趣个事情分佢兜聽，就連老伯姆來賣菜，佢乜會搨手喊：「買菜哦～！愛買菜無呢？」微微末末，講都講毋得煞，吾个大人朋友就係恁樣從細交陪來个，連吾姆都當欽服。

對巷仔口左幹上去个有錢人家同公園起到當闊，新聞報導過後，就當多遊客來遠寮，漸漸仔乜有人來擺攤仔做生理。佢輒輒會行兼去，人客來就搨手，無人客就打嘴鼓，毋多知仔又熟事哩！異多遊客聽著佢講客，會因為試著當親切，就買加兜仔，你講，有生趣無？

佢從來就無想著面帶笑容摺講客會有麼个好空，毋過確實帶分佢異多好空！總講，就係一種當湛斗<sup>2</sup>个感覺。

<sup>1</sup> 落鏈：音 lau lien；鏈條脫落。

<sup>2</sup> 湛斗：音 zam deu`；美好、很好。

【剃頭】張美容原作

前幾日仔去剃頭店剃頭，看著一個兩、三歲个細人仔，為著剃頭噉到噉殺天<sup>1</sup>，大人細子全部都搥到汗流脈絡，實在還衰過哪。佢這下較大地，剃頭該下毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手項該支剪刀摺剃頭刀。見擺一坐落凳頂，圍好剃頭帕，看著師傅擎等剪刀對等佢，佢就開始幅幅掣<sup>2</sup>，試著過忒千年恁久頭那毛正剪好，正想愛敢一下大氣定定，師傅又擎等利利个剃頭刀愛來刮吾腦之背<sup>3</sup>个毛腳，這下還較得人畏哩。佢驚到頸根緊跣、屎肫在凳頂扭來扭去，師傅緊刮緊咄<sup>4</sup>佢毋好停動，無奈何，佢牙根齧等、拳頭嫵搭等，由在人剝割。係走得得，佢定著起腳滑走<sup>5</sup>，一分鐘就毋停跔。唉！剃頭實在得人驚！

到三、四年生起勢，膽較在<sup>6</sup>哩，無恁驚剃頭，嘎變做惱剃

頭，因為師傅該張嘴當得人惱，佢總係在摺佢剃頭該時節，講講掣一千擔有个無个。可能大家係老鄰舍倘<sup>7</sup>熟事地，佢長透緊剃緊同佢打嘴鼓，一下仔問：「若頭那毛落麼个肥，仰會生到恁靚、恁多？」一下仔又講：「營養毋好專門搵到頭那毛去，愛食較高兜仔正有影哪！毋好像矮嫵車樣仔矮佻佻仔<sup>8</sup>。」佢面皮薄、驚見笑，長間目珠眨等詐無聽著，一肚懊惱<sup>9</sup>想：「仰結煞！脣頭个人定著在該笑佢地啦！還惱！還惱！實在還惱剃頭。」

最冤枉个係，有一擺師傅毋知仰仔，剪刀一溜<sup>10</sup>，嘎摺吾个耳公剪溜皮，跔等就出血。師傅緊同佢膏藥仔，緊嘍嘍嘍講：「頭那毛恁多，當毋好剪。」仰形嘎變做佢毋著！轉到屋下想愛同阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳公無分人剪忒就異好哩。」限勢佢愛噉毋得嘴扁，聽著阿姆恁樣講，黏時「哇」一聲噉出來。係做得，佢甘願鬢頭絞髻<sup>11</sup>乜無愛去剃頭。

剃頭个齣事，幾隻月就愛再過來一擺，還艱苦哪！佢日日想、日日望，想望煞煞大，做得像大人恁樣，去電毛店剪頭那毛，腳交等，有冷氣好吹、有人同你捉龍，還有人沍茶分你食，毋知幾好哪！

<sup>1</sup> 噉殺天：音 veˋ vongˋ sadˋ tienˋ；高聲呼叫。

<sup>2</sup> 幅幅掣：音 bid bid cadˋ；不停發抖。

<sup>3</sup> 腦之背：音 noˋ ziiˋ boi；後腦杓。

<sup>4</sup> 咄：音 doiˋ；喝斥。

<sup>5</sup> 起腳滑走：音 hiˋ giogˋ vad zeuˋ；拔腿就跑。

<sup>6</sup> 在：音 cai；穩固。

<sup>7</sup> 倘：音 tiongˋ；太。

<sup>8</sup> 矮佻佻仔：音 aiˋ dudˋ dudˋ eˋ；矮嘟嘟的。

<sup>9</sup> 懊惱：音 au nau；懊惱。

<sup>10</sup> 溜：音 tiu；滑開。

<sup>11</sup> 鬢頭絞髻：音 nungˋ teuˋ gauˋ gi；蓬頭散髮。

【孤栖个白鸚哥<sup>1</sup>】彭瑞珠原作

佢去學校个路項，會經過一頭當大頭个番樣樹<sup>2</sup>。朝晨，佢遠遠就聽著，當多鳥仔在樹頂搞到異大聲，當鬧熱。一開始，係幾隻白頭公在該緊講「出力，出力！出力，出力！」；續等，嘩嘍屎仔<sup>3</sup>乜來加油講「遽遽，啾啾！遽遽，啾啾！」；過咗，係一陣屋簷鳥「唧唧唧唧、唧唧唧唧」在樹頂開會个聲哨。

佢想，今晡日佢會有恁多鳥仔在樹頂搞呢？係，熱天个樹頂較涼爽？還係，樹頂還有當多番樣好食？佢臥頭看往上，無啊，番樣都分人摘淨咗，就伸著一樹个青葉定定。還過，啾啾滾个鳥仔，乜看毋著半隻，就聽著屋簷鳥還在該開會个聲定定。毋過，屋簷鳥實在倘<sup>4</sup>細隻咗，園在比佢兜大恁多个番樣葉裡肚，佢當然也看無。

日時頭，佢還在該緊想，佢明明聽著恁多鳥仔聲，又看毋著半隻，行過樹下，乜無看著鳥仔飛走啊，還怪奇嘢！放學个時

節，佢共樣行該條路，還行到番樣樹下，就看著番樣樹脣頂个楊桃撥撥跌<sup>5</sup>咗。佢看一下四圍，無風啊，過看一下楊桃樹頂，無人啊！該，楊桃佢會自家跌下來呢？佢行過去看，會行到樹下哩，就聽著樹頂有英文同佢講「哈囉<sup>6</sup>！」

原來，係一隻調皮个白鸚哥。朝晨，樹頂該陣鳥仔聲，就係你嘢！遠遠有鳥仔飛過，你就同人喊加幾聲仔鬥鬧熱，難怪佢會聽著恁多鳥仔聲，又看毋著鳥仔。佢乜行過去同佢「哈囉」，毋過，佢全無插佢。

佢係使性个細人仔樣仔，佢嘴嘟嘟仔，用腳抓<sup>7</sup>起一粒楊桃，喫一口就同佢擲忒。楊桃還行落地泥，佢又抓起另外一粒楊桃來喫，大粒、細粒，有熟、冇熟个楊桃，分佢擲到一地泥就係。

白鸚哥，係毋係倘孤栖咗呢？雖然，佢無插佢，佢還係「三隻鼻公笏」，異閒管个勸話佢講：「白鸚哥啊，你莫恁仔！楊桃又無得失你，做麼个尋佢兜出水呢？若屋下人，乜怕係尋你尋到當愁哦！你愛轉去無？你係孤栖，佢來同你做朋友，好無？」

<sup>1</sup> 鸚哥：音 en' go'；鸚鵡。白鸚哥，白色的鸚鵡。

<sup>2</sup> 番樣樹：音 fan' son su；芒果樹。

<sup>3</sup> 嘩嘍屎仔：音 bid lid sii' e'；綠繡眼。

<sup>4</sup> 倘：音 tiong'；太。

<sup>5</sup> 撥撥跌：音 bad bad died'；紛紛掉落。

<sup>6</sup> 哈囉：音 ha lo'；源自英文 Hello，你好之意。

<sup>7</sup> 抓：音 sa'；抓取。